

事有億萬計列在鬼帝鄧山上死罪條例之
愆記北上九元太極真人黑澤若乞九天元
太上尊帝王元君皆令罪事消除飛行七道
上登玉清洞遊太元乘景晨生北宴八素與
日相傾總朝真妃攝御萬靈



无上三天玉堂正宗高奔内景玉書卷下

清微神烈秘法卷

雷與秘論

劬七

夫清微者以象言之乃大羅天上鬱羅蕭臺
玉山上京上極无上大羅玉清諸天中之尊
也肇自混沌溟滓鴻濛未判之先大梵大初
之境即元始至尊之所治也乃一炁開明祖
劫是謂天根且清微法者即神霄異名也實
道中之妙法道乃萬法之祖雷乃諸雷之尊
非法中之法也故稟元始一炁統御萬靈復
有梵清景三炁之殊像絳碧玉琅丹景紫太
神之別名法中雷符玉章天經皆浩劫之初
梵炁自然結成於太空之中昔元始下降乃
命天真皇人按筆以書其文字廣長一丈藏
於紫微上宮玉京金闕命五老上帝掌之上
品靈書以保制劫運生天主地運度水火開
化神明為萬道之宗四萬劫一傳以示天人
也中品靈書藏於五嶽四瀆龍宮海藏命各
神掌之以安鎮嶽瀆開道泉源召龍負水役
使神霄仙眾亦四萬劫一傳以示神人也下
品靈書則應世宗師心心相授口口相傳與

天長存祈天福國弘道化人役使雷霆坐召
風雨斬滅妖邪救濟早滂拯度幽顯贊助皇
民即今人間清微雷法妙道是也實與諸法
不同明達上人一聞頓悟蓋五行以庚為主
而五炁以一為祖萬法以心為正其法簡易

不若有為不落無作不貢存想無泥虛文無
祭祀無禱祝若此比誣詭也其妙乃以吾神
合彼神吾靈合彼靈儒書謂致知格物是矣
但於平日行住坐卧四威儀中必要收斂身
心萬緣頓息存無守有專一無二守無所守
存無所存一念真常如在太極未判混沌之
先虛空圓光之內一竅之中其大無外其小
無內太極未判混沌一般身心俱無止在太
虛一點靈明自然宏照十方心田無穢性地
絕塵久則寂然不動感而遂通到此田地一
舉目一動念將帥洋洋乎如其左右靜則
是道動則是法口啓心存立彰昭格即此乃
大道之根萬法之本惟其始終精一不二念
念相續於四威儀中入乎無間是謂達人能
事畢矣